

Al è jessût 'Un contado chiamato Friuli' une racuelte di editoriâi e intervistis a **Gianfranco D'Aronco**, publicadis dal 2009 al Zenâr dal 2014, editade di "LaNuovaBaseEditrice" in colaborazion cu la Provincie di Udin, la Fondazione Crup e la Union des provinciis dal Friûl - Vignesie Julie.

O vin domandât a **Vittorio Zanon**, l'editôr, cualchi impression su cheste ultime opare dal pari dal autonomisim furlan.

Cemût nassial 'Un Contado Chiamato Friuli'?

"Chest libri al siere un progjet editoriâl, nassût passe 10 agns indaûr, cuant che D'Aronco al à vût il boncûr di proponinus la publicazion dai siei tancj scrits, scomençant dal dopovuer fint in di di vuê. Il prin volum al è vignût fûr tal 2008 'Il Friuli a Mezzadria' e al presentave 141 articui e saçs: il prin al jere dai 2 di Dicembar dal 1945 e l'ultin dai 9 di Dicembar dal 2008. Vuê il progjet al rive insom cun cheste ultime racuelte di 37 tocs e un prezios contribût cul titul 'Udine capoluogo mancata della Regione autonoma' gjavât fûr de publicazion 'Udin: mil agn tal cûr dal Friûl' curade di Gian Carlo Menis, in ocasion dal milenari di Udin e publicade tal 1983 de Societât filologjiche furlane".

Parcè chest libri vuê?

"Parcè che prin di dut al à un alt significât culturâl e sociâl tal sens di tignî alt il dibatit su dulà che o vin voie di puartâ il Friûl. A son riflissions scletis e documentadis su la cuistion no risolte dal rûl mai ricognossût ae tiere furlane tal ambit de unitât



Gianfranco D'Aronco

Al è jessût 'Un contado chiamato Friuli', racuelte di editoriâi e intervistis di **Gianfranco D'Aronco**. L'editôr **Vittorio Zanon** al conte il parcè de opare.

» DI CHRISTIAN ROMANINI

Viaç tai 50 agns de regjon

regjonâl. A son scrits che a fasin discuti e che a fasin patî cui che al à a cûr il destin dal Friûl: no si preparin biei moments pai furlans, e il piês al è che no si rindin cont, restant pal plui indiferents".

Cemût definiressial Gianfranco D'Aronco?

"Al somearès une vôs tal desert, massime in chest moment storic cussì delicât. D'Aronco al continue, cun ironie e creance, a marcâ la cualtât di sotans dai furlans tai confronts de istituzion Regjon Friûl-Vignesie Julie. Di fat, propit cuant che si discut

di mantigniment de specialitât e si riforme il sisteme dai ents locâi, D'Aronco al aprofite par mostrâ inmò une volte la grandece e il valôr dal Friûl, che al mertarès ben plui atenzion e autonomie rispjet a ce che al è stât fat fin cumò".

Isal cjampanillism?

"No, al è un viaç tai 50 agns di cheste regjon, necessarie ma imperfete, sbelançade rispjet al naturâl baricentri dal teritori, che e à fat nassi cussì un incen-trament diviers".

✉ ilfriuli@ilfriuli.it

RICORS AL TAR

Ancje Palaç Belgrât cuintri les Uti

Si dâ dongje ancje la Provincie di Udin al ricors devant dal Tar dal Friûl Vignesie Julie cuintri de Regjon, promovût di 57 Comuns des provinciis di Udin, Gurize e Pordenon par domandâ l'anulament de delibare regjonâl 180 dai 4 di Fevrâr 2015 dulà che a vegnin individuadis les Uti (Unions teritoriâls intercomunâls).

Palaç Belgrât, su la fonde di ce che al è stabilît de Zonte provinciâl, si metarà dongje tal judizi proponint un ati di intervent volontari "ad adiuvandum" a poie dai ricorints principai, par fâ valê i principis di autonomie, sussidiarietât, rappresentativitât une vore comprometûts de riforme dai ents locâi (leç 26 dal 2014). "La gnove gjeografie dal Friûl Vignesie Julie dissegnade de Regjon - al spjeghe il President de Provincie di Udin **Pietro Fontanini - e creará cetancj disecuilbris teritoriâi a dam dal Friûl, cûr di cheste regjon, ma ancje pesantis consecuencis te organizazion, te ufierte dai servizis e te spese de machine amministrative che, magari cussì no, e cressarà smascarant il sparagn prometût ai citadins".**

SCOLTADIS DI DRIUS

Masse inamorade

E jere cussì memorade dal so omp che, par no frujâlu, e leve tal jet cu l'omp di une so amie.

Euronews informa

La bataie di D'Aronco: "Al Friûl ce che al è dal Friûl"

"Evâl la pene cumò di tornâ a scombati, o sin tal just. O vin buinis sperancis, za cence lâ fûr di cheste sale. Al è di tornâ a viodi il Statût, riformâ il nestri asset istituzionâl par dâ une volte par dutis al Friûl ce che al è dal Friûl e a Triest chel che al è di Triest, metint la fin a un incen-trament clamât par scherç razionalizazion". Al à sierât cussì il so intervent il professor **Gianfranco D'Aronco** in ocasion de presentazion, in Provincie, de racuelte di editoriâi e intervistis "Un contado chiamato Friuli" (LaNuovaBase cjase di edizion), ocasion par discuti de autonomie de regjon, dal destin dal Friûl e de sô identitât ma ancje des consecuencis de riforme dai ents locâi. "Une gnove gjeografie de regjon - al à dit il President de Provincie di Udin **Pietro Fontanini** - che e rindarà inmò plui fuart il contrast tra Triest che e manten il so status quo e duncje cun ents, beneficis e privileçs che no si puedin toçjâ, e il Friûl che al ven sdrumât e frugonât in tantis



piçulis realtâts che a son dutis di verificâ e sperimentâ. Une riforme che e puartarà a une disomogeneitât te organizazion e te ufierte dai servizis ai citadins. Mi auguri che i furlans a cjapedin cussience des consecuencis di cheste riforme, un passaç che al scancelarà il Friûl as centrâl di cheste regjon". Dacuardi cun lui ancje Bons. **Duilio Corgnali** che al à



presentât la publicazion dulà che a son trentes scrits di D'Aronco dal 2008 al Zenâr 2014. "Se il teritori al vignarà dividût in 18 tocs e sarà une ruvine pe unitât strategjiche dal Friûl. Restant dome une citât - Triest - che e cjape dentri dutis lis prerogativis, il dialic nol è coret rispjet al "contado" che al restarà come che al è. Al maravee

che i furlans no si visedin di chest". Chest moment critic pal destin dal Friûl al è però pal professor **Sergio Cecotti** "bon par une gnove fase politiche; catalizadôr par inviâ un gnûf moviment politic dal popul furlan". E chei che a podaressin cjapâ cheste strade e son i sindics. "Jo o pensi che a podedin jessi 20-30 in stât di metisi come semence in chest moviment - al à dit Cecotti -. A àn za una rapresentance istituzionâl sul teritori e a puedin fâ agregazion. Ma il moment par cjapâ cheste oportunitât al è curt: un an". L'editôr **Vittorio Zanon** al à metût in lûs la valence culturâl e sociâl dai scrits di D'Aronco, "culturâl, par vie che al contribuìs a tignî alt il dibatit su cemût e dulà che o volin puartâ il Friûl, sociâl parcè che nus permet di tignî vive une testimoneance concrete e reâl su la storie dal Friûl". **Lionello D'Agostini**, president de Fondazione Crup, al a sburtât dut il popul furlan a fâ propriis lis peraulis di D'Aronco in cheste bataie a pro dal Friûl.